

HITZ BITAN

ADIN TXIKIKOAK. Mozioak aurkeztuko dituzte

Gurasoek bahitutako haurren aldeko plataforma sortu dute Erreterian

Agentziak | DONOSTIA

Gurasoek bahitutako haurren aldeko Asporen plataformak, Erreterian Udalak eta Langaitz ikastolak Burak-Lagun plataforma sortu dute. Plataformak, orokorrean, gurasoek egindako bahiketak salatzea du helburu; baina kasu honetan, Burak Kalemnci Erreterian 10 urteko hauraren kasuak du lehentasuna.

Kalemnciren aita Turkiakoa da, eta 2001eko urtarilean ai-

tak Erreterian etxetik eraman zuen. Ordutik, Ines Nieto ama hauraren bila dabil, eta duela bost astetik Turkian dago, haurra etxeratzeko asmotan.

Burak-Lagun plataformak atzo iragarri zuenez, euren asmoa Hego Euskal Herriko eta Espainiako udaletan mozio bat aurkeztea da, Burak Kalemnciren familiarentzako laguntza ekonomiko zein morala eskuratzeko.

Nietoren abokatuak, bestetik, kereila aurkeztuko du Turkian.



JUAN HERRERO / EFE

Erreterian udaletxean aurkeztu zuten, atzo, plataforma berria.



Juan Jose Baños Deia-ko zuzendaria, herenegun.

KOMUNIKABIDEAK

Gaur beteko ditu 'Deia' egunkariak 25 urte

Gaur betetzen dira 25 urte Deia egunkariak lehenengo zenbakia atera zuenetik, 1977ko ekainaren 8an argitaratu baitzuten kazeta lehen aldiz. Urtebetetze biribil hori ospatzeko Deia-k hainbat ekitaldi antolatu ditu egunotarako, besteak beste, herenegun Bilbo-ko Arriaga antzokian egindako jaia. Festa horretan Euskal Herriko hainbat arlotako —kultura, politika, kirol eta abarretako— pertsona ezagunak elkartu ziren, eta irakurleek gaur izango dute aukera bertan gertatutakoari buruz irakurtzeko. Horrez gain, 25 urteen laburpena jasotzen duen liburua kaleratu du Deia-k, eta gaur lehen zenbaki hura argitaratuko dute berriro ere.

HEZKUNTZA

I. Pilota Maratoia egiten ari dira Duranako Ikasbidea ikastolan

Atzo goizean goiz hasi eta gaur eguerdian amaituko da Duranako (Araba) Ikasbidea ikastolan antolatutako Lehenengo Pilota Maratoia, zentroaren urteroko festa baliaturik. Guztira, 30 ordu ingurutan partidak izango dira, etenik gabe, palaz, eskuz nahiz zestaz. Parte-hartzaileen artean, zentroko 300 ikasle, irakasle eta guraso daude. «Pilota sustatzeaz gain, kirolean euskararen erabilera bultzatzea» da maratoniaren helburua.

FAMILIA

EAEko Ekonomia eta Gizarte Kontseiluak Jaurlaritzaren laguntza plana kritikatu du

Seme-alabak dituzten gurasoentzako laguntzen plana kritikatu zuen, atzo, EAEko Ekonomia eta Gizarte Arazoetarako Batzordeak. Prentsa ohar baten bidez, Kontseiluak dio plangintza gizarte eragileen parte-hartze handiagorekin egin behar zela. Era berean, araudia 2002. urteaz geroztik aplikatzea gaitzetsi du, hori aurretik familia izan duten gurasoen kalterako izango delako.

HEZKUNTZA

0-3 zikloaren dekretua erretiratzeko eskaera aurkeztu du PSE-EEk Gipuzkoako Batzar Nagusietan

Gipuzkoako PSE-EEk lege besteko proposamen bat aurkeztuko du Gipuzkoako Batzar Nagusietan, Eusko Jaurlaritzako Hezkuntza Sailari 0-3 urte arteko zikloa arautzeko aurkeztutako dekretua erretira dezala eskatzeko. PSE-EEko batzarkide Miguel Buenek aurkeztutako proposamenak dioenez, «aurretik izan ez den bezalako eraso izan daiteke hezkuntza publikoarentzat»; haren arabera, litekeena baita gurasoek haurrak hezkuntza pribatuan sartzeara eta gero bertan jarraitu ahal izatea.

ETORKINAK

Espainiako Gobernuaren asmoa salatu du SOS-Arrazakeriak

Espainiako Gobernuak Atzerri-tarren Legea aldatu eta gogortzeko duen asmoa salatu zuen atzo Gipuzkoako SOS-Arrazakeria erakundeak. Etorkinen egoera are okerragoa izango dela dio.